

**Locucion verbau : estar de + nom o grop nominau**

- *E pòts viéner doman matin ?*
- *Non, que soi d'enterrament(s).*
  
- *Que soèi a vòste tot de ger n'i èran pas arrés !*
- *Que vòs, qu'èram de banquet !*
  
- *Lo ton pair que hè tostemps deu maçon ?*
- *Dià ! Qu'ei de retrèita desempuïsh bèra pausa !*

**Sintagma nominau (grop d'elements qui an tostemps la medisha fòrma) : lo baish temps...**

- *Per aquestes torns non hè pas hèra beròi !*
- *Que vòs, que vam de cap tau baish temps.*
  
- *Diga'm a quin moment e plantas la ceba ?*
- *Mei que mei que la planti au baish temps*

Lo baish temps qu'ei drin abans l'ivèrn, au darrèr de l'estivet de la Sent Martin. La loncor deu dia que vad de mei anar mei braca, que podem díser que baisha. Lo cèu eth tanben qu'ei sovent embrumat e que sembla mei baish.

**Adjectiu qui marca l'intensitat : bèth, bèra ..**

- *Mes on ei aqueth diache d'arrestèth ?*
- *Que l'avem deishat au bèth bèc deu solèr. (bèc = som)*
  
- *E l'as trobat lo gat ?*
- *Oc ! Que s'èra estujat au bèth hons deu garatge !*

Ací « au bèth » que vòu díser « tot a fait au », « completament au ». Que's pòt trobar au feminin mes aqueth emplec qu'ei pro riale

*L'ausèth que s'èra pausat a la bèra cima de l'arbo*

**A pè passat...**

*« A pè passat » qu'ac disèn quan èri mainada. Que'm rapèla hèra plan. Que vas har quauquarren tota setmana, sei pas jo, ajudar lo vesin, har ua visita... e puïsh que'n vas aver pro, que te'n vas arregolar... Lavetz que dises « D'ara enlà que vam har a pè passat » cet a díser en aqueste cas, a setmana passada.(M.B.)*

Que's deu poder emplegar tà « un dia sus dus » : que vam har « a dia passat » o « a pè passat » Qu'avem ua pièla d'arrepoèrs e de dícers dab lo mot « pè » mes aquera expression n'ei pas de hèra bon comprèner. Que sembla voler díser avançar un pas sus dus, donc a pè chanquet. Sautar un pas qu'ei, mei generaument, sautar ua etapa

**Formuleta : qué har ?**

Quan plora o purmèr quan brama, lo nenè que sembla díser :

*Qué har ? Qué har ?*

Quan ètz en un arolet d'adultes vagants, se n'i a un qui ditz « E adara qué vam har ? » que n'i aurà lhèu un qui responderà :

*Gahà's a las popas e dançar !*

Expression populara entà dar l'enveja de dançar e, au-delà, balhar drin endavant au grop.